

Timoti Yana Leta Naona Paulo Wayahina

Buki Taina Wayahina

Buki taina a tau ginuma vivane Paulo, ka leta taina omo Timoti wayahina, yana leta naona Paulo wayahina. Timoti amana me Girisi, ka ayona me Iudea. Ka avaha Timoti vi-tau vitumahana Iesu wayahina, Paulo nui ini-keyekeyei, e tauna Paulo ivaitei ya paisewa wayahina. Paulo Timoti ana wava tomatomani mani leta nihenia (Rom 16:21; 1 Korinita 16:10; 2 Korinita 1:1; Pilipi 1:1; 2:19; Kolose 1:1). Ka ana wava kadu buki Ebereu nihenina kavaniahei (Ebereu 13:23). Tutana Timoti leta taina vaniahei, tauna meagai Epesusi nihenina mamaei.

Ka leta taina nihenina Paulo ya pai mini ananina aitonu. (1) Paulo Timoti nau-vi-avini viwavene-nana vitupu vovouna wayahina. Viwavene-nana vin'-omo, iuna me Iudea yai viviwava tutu-aina ka mani tomotau yai vitumahana vitupu inau-tamoia. Ka tupwai tomotau viwavene-nana vovouna ivitumahanei, inaunau-wahe vivane tanopi taina goyona, ka aituhu aviyaivia yai nuanua ito-yavuha ivaniahei, tau nau-wawani anamana hivahivana in'-anamanei kadu tau nau-wawani dewa tunina tunina (tavine deina) ivito-potei. Paulo Timoti vonei viwavene-nana vitupuina na-vihahaiei. (2) Ka Paulo tau ekalesia habuhabui ai veimea venei tapanono wayahina,

ka kadu tau eta-naonao ekalesia nihenina ai veimea venei yawai wayahina. (3) Ka Paulo Timoti vonei medeina tauna Iesu Tau Ito-yavuha na-ivaitei tunuhina.

Nau-kaiwa

¹ Yaubada ito-yavuhika, ka itoka yaka nua-vaniaha nui kapotapota Tau Ito-yavuha Iesu wayahina. Ka ainuai iveimeyeu avi-tau hae Iesu Tau Ito-yavuha wayahina. Yauke Paulo

² leta taina aginumi omo natu Timoti wayahima. Avi-wahanim natu, iuna yam vitumahana yau vitumahana aitamoata deina. Ka yau viama Yaubada Amaka kadue Tau Ito-yavuha Iesu yaka Kauvea ainua wayahia am-venena awawaehina ka nua gomagomanina iomo wayahima evania-hei.✧

Nau-vi-avini Viwavenena Vitupu Wayahina

³ Nonova aka inua Epesusi nihenina kamamaei, ka tutana ani-tawanem aomo papani Masedonia wayahina, aviamem Epesusi emamaei. Yau nu-anua ananina emamaei Epesusi nihenina. Iuna ononotoi tupwai tanai iviwavenena bwagona. Wayahina, eveimeyei igenuana, eha iviwave-nena vitupu.

⁴ Kadue eveimeyei eha yai tuta ioneonei viviwava vitupu tutuai wayahia. Kadue inau-videvidei, ka yai dewaia eha tunuhina. Wayahina, tau ekalesia yaiai nui inau-vonuvonu. Ka viviwavai eha Yaubada ya paisewa ina-ivaite.

✧ **1:2:** Dew 16:1-3; Tit 1:4.

Kate itoka Yaubada ya paisewa kapaipaisewei, habuhabuka nau-wawanika yaka vitumahana nui kapaисewei.✧

⁵ Wayahina, tau viwavenenaia vitupu eveimeyei igenuana. Iuna yau nuanua tau ekalesia Epesusi nihenina idewa-vidovidohei tunuhina. Ka dewa-vidovidoha tunuhina vin'-omo nuaka nua-mahemaheina wayahina, ka vin'-omo aka ayaunena hadahadanina wayahina, kadu vin'-omo yaka vitumahana tunuhina wayahina.

⁶ Ka tau ekalesia tupwai avaha ivi-kwavakwava ka imagigino. Iuna viwavenena tunina ivi-munie, ka ivi-putu inau-vonuvonu viviwavai awakabi wayahi.

⁷ Tau viwavenena vitupu yai nuanua Yaubada ya veimea iviwavenei tomotau wayahia. Ka inuanua aviani iviwavenei vivane tunuhina ana noe. Kate eha. Tai eha yai viwavenena an' anamana it'-anamane-vidoha.

⁸ Kate itoka avaha kanamanei aituhu tomotau veimeana kaviwavenei tunuhina, akanai Yaubada ya nuanua ya veimea wayahina vin'-omo yaka viwavenena wayahina.✧

⁹ Kadu avaha aviani Yaubada ya nuanua veimeana wayahina kanamanei. Veimeana eha tau tunutunuhi tauna matana wayahi. Kate veimeana a paisewa vivane tomotau goyogoyoi yai dewa goyona na-si-vin'-omane. Yai dewa taina deina. Tai veimea itana-bwegebwegei, ka Yaubada Vaneana imana-giboei, kadue eha Yaubada wayahina

✧ **1:4:** 1Ti 4:7; Tit 1:14. ✧ **1:8:** Rom 7:12, 16.

ita-iwaodu. Ka tau tau goyogoyoi, kadue tau yawai nihenina nuanua hivahivai kadu goyogoyoi imamaei. Ka eha Yaubada wayahina ita-tapanono, kadue ayo-amai ivunuvunui, ka inau-vi-aniga-kavokavovo.

¹⁰ Ka tau yai ai awawai nui ikenenene, o tau yai nuanua inau-yehai onoto onoto nui, o vavine vavine nui, kadue tau tomtau ivain-aui, iaimwaneyei, e ivi-tau paisewa-kavokavovo, ka ivitupu, ka ivona-dabadaba vitupu kotuV wayahina. Yaubada ya veimea vivane tomtau-naia habuhabui wayahi, kadue aituhu aviyaivia yai dewa Yaubada Vaneana bou-opuei, veimeana kadue tau wayahi. Ka veimeana a paisewa vivane yai goyona na-si-vin'-omanei.

¹¹ Viwavenena tunutunuhina vivane Yaubada Vaneana. Tauna didigana ani-vainena ka nau-iaiaava habuhabuna tauna wayahina mamaei. Ka tauna didigana vo-pataka Vaneana Ahiahina nihenina. Nonova Yaubada paisewana venue, vivane Vaneana Ahiahina ahaehaeyei. Ka tauna anamaneu paisewana eha abou-oho.

Paulo Ya Nau-kaiwa Kauvea Wayahina

¹² Yauke anau-kaiwa Tau Ito-yavuha Iesu yaka Kauvea wayahina. Iuna tauna bagibagi venue, kadue vi-nua-dadaneu, e paisewana venue. Ka tauna dewei deina, iuna tauna anamaneu paisewana anau-yehai.✧

¹³ Nonova yauke mwagemwageu, ka eha Iesu at'-anamane tauna koiaka. Wayahina, yauke

✧ **1:12:** Dew 9:15; Gal 1:15-16; 1Ko 15:9-10.

Kauvea apa-goyogoyoei ka manimaniniu tomotau avunuvunui. Aina vona tunuhina, kate tauna ate-nuanuaieu, kadue yau dewa goyo-naia wayahia nua-piahiu.✧

14 Yaka Kauvea am-venena awawaehina ito-iwahi wayahia. E am-vene-nana awawaehina vin'-omo vitumahana ka dewa-vidovidoha nui Tau Ito-yavuha Iesu wayahina.

15 Vona taina vona tunutunuhina, ka tau ekalesia habuhabui nau-wawani inua-vi-anai. Tau Ito-yavuha Iesu omo tanopia iuna ya nuanua tau goyogoyona na-ito-yavuhi. Ka yau dewa goyona mani tomotau yai dewa goyona igoyo-tawanei.✧

16 Ika, yauke goyo-vaineu, kate Tau Ito-yavuha Iesu ate-nuanuaieu, ka ya toha-vi-anai wayahiu vivane mamanaina. Nonova yauke goyo-vaineu. Kate ataina yauke tomotau yai pai dune. Iuna Tau Ito-yavuha Iesu ya nuanua tomotau ya toha-vi-anai wayahiu inononi, in'-anamanei ya toha-vi-anai kadu mamaei tau wayahi, eha na-iakwa. Akaka tau ai pata in'-ate-vatu, ivitumahanei, e yawai-vavaha ivaniahei deina.

17 Wayahina, tauna tanopi habuhabuna ana kiniV, ka tauna ya pai veimea na-ma'-vavaha, kate ataina itoka tomotau eha aka pata kadueye. Ka tauna Yaubada-hoina. Ka yau nuanua tomotau in'-apa-vidovidohei, ka in'-awa-davei eha a ito-vewana wayahina. Ana pata deina.

18 Timoti, awa-natunem. Nonova apa-taputapu tupwai ivin'-omo wayahim, ka am veimeana

✧ 1:13: Dew 8:3; 9:1-5. ✧ 1:15: Luk 19:10.

avaha avenem, akanai apa-taputapu-naia iawaehei aitamoata. Ka aituhu apa-taputapu-naia enuani ahiahina, ka aituhu evi-munie, akanai aka havia-hoina Satana evi-naua-vidohei deina.

¹⁹ Kadu nau-wawanim yam vitumahana ahiahina kadu am ayaunena hadahadanina ainua enua-vi-anai. Tupwai tomotau dewa ainuai ini-tawanei, e ini-haini. Ka tau i yai vitumahana ivita-vovoni, aitam wae nai wayahina ituna, gavivina deina.

²⁰ Tau wayahia ainua vivane Humenaeusi ka Alekisanidera. Tau iviwavenena bwagona, kadu Yaubada ibou-opuopuei. Ka yauke avaha ainuai am-veneneyei Satana nimana wayahina, e tauna ya bagibagi wayahina na-dewa-yaiyaiei. Ka apaina ainuai in'-anamanei eha nau-wawani Yaubada ana wava imana-giboei.✧

2

Paulo Ya Viwavenena Tapanono Wayahina

¹ Yauke yau nuanua ananina taina. Naona Yaubada ehidhidei tauna ya nuanua tomotau venevenei. Aituhu tau i yai nuanua o aituhu eha yai nuanua, akanai, eviama wayahi kadu Yaubada enau-kaiwei tomotau habuhabui wayahi.

² Ka kadu kini Vka tau veimea anani habuhabui wayahi eviamei. Iuna yaka nuanua nua gomogomanina ka yawai tunuhina nui kamamaei. Ka nau-wawanika yaka dewa habuhabuna Yaubada ya nuanua wayahika deina, ka aituhu deina, itoka ahihikata.

✧ 1:20: 2Ti 4:14-15; 1Ko 5:5.

³ Ka dewaia dewa ahiahina Yaubada matana, ka dewaia Yaubada yaka Tau Ito-yavuha vo-vi-dewa-haiawi.

⁴ Ka tauna ya nuanua tomotau habuhabuka ito-yavuha kavanaiahei, e kadu nua-uya tunutunuhina an' anamana kan'-anamanei,

⁵ vivane Yaubada aitamoata, kadu etawana aitamoata mamaei Yaubada itoka tomotau niwanikaia, ka etawanana vivane Tau Ito-yavuha Iesu, ka tauna kadu onoto aitam, itoka deina.

⁶ Ka tauna yawaina awaehei, ivunui, e tomotau habuhabuka nau-seanika. Ka tutana Iesu aniga, tauna Amana ya nuanua ananina si-vin'-omanei vivane ya dewana itoka tomotau ito-yavuhika.✧

⁷ Wayahina, tauna vi-nua-dadaneu, e vi-tuneu avi-tau nau-wahe, kadu avi-tau hae tau i eha me Iudea wayahi, ka kadu avi-tau viwavenena vitumahana tunuhina wayahina. Ka yau vonana tunuhina, eha vitupu.✧

⁸ Yau nuanua meagai habuhabui wayahia, ononotoi habuhabui iviama. Yau nuanua tau i yawai tunutunuhina Yaubada matana, e ni-mai isi-nai iviama. Eha imaga-bawa, ka eha ivona-patapata.

⁹ Ka kadu yau nuanua vaivine wayahi taina. Avi kwama vaivine ahihinata nau-wawani, akanai kwamaia iweteweteni, ka avi kwama pai ana-dibidibi ivihahaiei. Tupwai apanai ivi-petapeta, o goula V, o yano, o dadi tunina tunina ivaivani, o kwama patana ananina iweteweteni. Ka dewai eha Yaubada ya nuanua wayahi.✧

✧ **2:6:** Rom 3:29-30; Gal 1:4. ✧ **2:7:** Dew 9:15; Gal 2:7-8; 2Ti 1:11.

✧ **2:9:** 1Pi 3:3-5.

10 Iuna kwama-hoina ahiahina Yaubada matana vivane dewa ahiahina. Ka Yaubada ya nuanua dewa ahiahina wayahina yawai ivaivani. Aituhu avi vaivine ivonavona Yaubada iawa-davedavei, akanai tau ividoha Yaubada matana yai dewa ahiahina wayahia.✠

11 Ka vaivine nau-wawani igenuana, ka kadu nau-wawani tau tau veimea aitamoata aitamoota ivi-ateteyei, e nua-uya an' anamana ivaniahei deina.

12 Yauke eha at'-awaeha vaivine ononotoi ivi-wavenei, ka kadu eha at'-awaeha vaivine ononotoi iveimeyeyei, kate vaivine nau-wawani igenuana.✠

13 Iuna naona, Yaubada Adam vevewanei, e munia Eve.✠

14 Ka kadu Satana eha Adam ta-nono dewa goyona wayahina. Eha! Satana vavinena nonoi, e vavinena vi-tau goyona.✠

15 Kate vaivine ito-yavuha ivaniahei yai vi-natuna wayahina, ka aituhu tuta tuta ivitumahana, ka aituhu idewa-vidovidoha, kadu aituhu yawai ahihiata, ka aituhu tau ai heta dewa goyona ivihahaiei deina.

3

Tau Eta-naonao Ekalesia Nihenina

1 Vona taina vona tunutunuhina. Aituhu aviyaivia nuai epepei ivi-tau dune-vi-avina, yai nuanua paisewa ahihi-vainena ekalesia nihenina idewei.✠

✠ **2:10:** 1Ti 5:10. ✠ **2:12:** 1Ko 14:34. ✠ **2:13:** Nao 2:7, 21-22; 1Ko 11:8-9. ✠ **2:14:** 2Ko 11:3; Gal 3:1-6. ✠ **3:1:** Dew 20:28.

² Ka tau dune-vi-avina-vovou nau-wawani an' anamana ahiahina tomotau mataia. Kadu tau dune-vi-avina-vovou aitamoata aitamoata nau-wawani tavine awana aitamoata. Ka tauna eha vi-naua, kate tauna ana heta dewa goyona vihahaiei, kadue nau-wawani tomotau iapa-vidovidohei, kadu nau-wawani ya manua awaehei mani tomotau na-ivaitei, kadu nau-wawani ana pata tomotau na-viwavenei.✧

³ Ka nau-wawani eha nim-kwavakwava, kadu eha manini-kwayavoni, kate tauna nau-wawani yana vona bigana. Kadu nau-wawani eha vona-patapata, ka eha kina nuana epepei.

⁴ Kadu tauna nau-wawani yana yoko eta-naonaoi ahiahina, kadu natunatuna veimeyei tuta tuta ivi-ateteyei, ka eha yana vona inau-vonuvonuei.

⁵ (Edu. Aituhu aviyaivia eha ai pata yai yoko ieta-naonaoi ahiahina, medeina ai pata Yaubada ya ekalesia ieta-naonaoi ahiahina?)

⁶ Aituhu aviyaivia ivi-tau ekalesia-vovou, eha en'-awaehe tau i vi-tau dune-vi-avina. Iuna aituhu tau ekalesia vovou i vi-tau dune-vi-avina, memeanina ina-nua-vane. Wayahina, apaina avi dewa-yaiyai Yaubada Satana venei ya nua-vane wayahina, tau kadue ivaniahei aitamoata deina.

⁷ Ka kadu aituhu aviyaivia yai nuanua ivi-tau dune-vi-avina ekalesia nihenina tau nau-wawani ai anamana ahiahina tomotau ekalesia upuna imamaei mataia. Aituhu eha, memeanina Satana vi-daei, e ini-yauyau ananina ivaniahei.✧

⁸ Ka kadu tau ivaita aitamoata aitamoata

✧ 3:2: Tit 1:6-9. ✧ 3:7: 2Ko 8:21.

nau-wawani tau dune-vi-avina deinake. Tau ivaita nau-wawani inuanua tunutunuhina yawai wayahi, kadu Yaubada ivi-ateteyei, e ai anamana ahiahina deina. Eha meai nahanahana, kadu tau eha waina Vinim-vaine, ka eha kina dewa goyona wayahina vin'-omo nuai epepei.

⁹ Ka tau nau-wawani pai mini ananina yaka vitumahana wayahina ai ayaunena hadahadanina nui inua-vi-anai.

¹⁰ Wamke nau-wawanim naona yawai edudueyei, ka aituhu yai vitumahana eha vitupu, munia evi-nua-dadanei ivi-tau ivaita akanai.

¹¹ Ka tau yai vaivine nau-wawani deinake. Tau nau-wawani inuanua tunutunuhina yawai wayahi, ka kadu Yaubada ivi-ateteyei, ka ai anamana ahiahina deina. Ka nau-wawani tau eha mani tomotau imana-giboei, kadue nau-wawani tau ai heta dewa goyona ivihahaiei, kadue tuta tuta nau-wawani mani tomotau vaivinei yai dewai ahiahina idudueyei, in'-anamanei yai dewa ka yai vona aitamoata.*

¹² Tau ivaita tavitavinena nau-wawani awana aitamoata, kadu nau-wawani natunatuna eta-naonaoi ahiahina, ka kadu ya manua nihenina vo-vi-aiiaia ahiahina ka yana yoko dune-vi-avina ahiahina.

¹³ Ka avi tau ivaita ieta-naonaoi ahiahina, tau ai anamana ahiahina kadu yai ate-vatu ananina ivaniahei yai vitumahana Tau Ito-yavuha Iesu wayahina.

¹⁴ Timoti, yau nua-vaniaha nui apotapota, e tuta kutakutana na-iakwa an'-omo wayahima.

* 3:11: Tit 2:3.

Kate tuta ataina yau nuanua dewaia habuhabui aginumi amataedam yam leta taina nihenina.

¹⁵ Iuna aituhu eha au pata avo-kwayavoni, am pata avi dewa nau-wawanim Yaubada yana yoko nihenina en'-anamanei. Ka yoko-nana vivane Yaubada yawayawaina ya ekalesia, ka ekalesiana vivane ohona ka unu-tutu, ka yaka vitumahana vo-vi-avini.

¹⁶ Eha ana pata aitam koiaka na-nau-vonuvonu vona taina wayahina. Iuna vona taina nihenina pai mini hivahivana yaka vitumahana tunutunuhina wayahina mamaei. Pai mini-nana ananina, ka tauna pai mini-nana viwaveneka deina.

Tauna vi-tomotau,
 ka tau ma' tanopi idudueyei.
 Ka Nuana Ahihinata
 Tauna a tunuha si-vin'-omanei.
 Kadu anelose
 Tauna idudueyei,
 e tau vi-papani wayahia
 vaneana inau-waheyei.
 Ka tau ma' tanopi
 habuhabuna ivitumahanei.
 Ka Tauna didigana nui
 wahuma vaneyei.☆

4

Timoti A Veimea

☆ **3:16:** Ioni 1:14; Kol 1:23; Mar 16:19.

¹ Nuana Ahihinata avaha apa-taputapu mahemaheina vivane tuta tepakaia wayahina tupwai tomotau yaka vitumahana tunutunuhina wayahina igenuana, ini-tawanei, ka Satana yan'anelose yai viwavenena vitupu ivi-munie.

² Viwavene-nana vin'-omo tomotau meai nahanahai wayahia, ka tau ai ayaunena ahiahina avaha ivita-vovoni, kainumu weweavina wayahina ai ayaunena iweavi deina.

³ Ka tomotau tavine ivito-potai mani tomotau wayahi, ka kadu mani tomotau iveimeyei aniani tupwana eha in'-ania. Kate Yaubada aniani habuhabui vevewanei ahiahina, ka aituhu aviyaivia inau-kaiwei, akanai in'-ania. Aituhu aviyaivia yai vitumahana tunutunuhina, tau avaha ianamanei aniani habuhabuna awawae-hina wayahika.✧

⁴ Iuna avi dewa Yaubada vevewanei, dewaia ahiahina. Wayahina, aituhu itoka tau ekalesia Yaubada kanau-kaiwei vahitau wayahina o aniani wayahina, eha aitam veimea veimeyeka vahitauna o anianina kavihahaie.

⁵ Dewaia dewa ahihinata, iuna Yaubada ya vonana wayahina kadu yaka nau-kaiwa wayahina.

⁶ Aituhu viwavene-naia tunutunuhina tau ekalesia meagai Epesusi nihenina eviwavenei, e yam dewana viwavenei wamke tau paisewa ahiahina Tau Ito-yavuha Iesu wayahina. Ka eviwavenei wamke vitumahana tunutunuhina ana vona wayahina avaha enata, evi-onoto, kadu viwavenena ahiahina evi-muni-waiwaiei.

⁷ Ka avi viviwava banana eha Yaubada wayahina, kadu avi viviwava pouna awakabina

✧ **4:3:** Nao 9:3; Rom 14:6; 1Ko 10:30-31.

vaivine anani inau-videvidede evihahaiei. Kate nau-wawanim Yaubada yana dewa ana noe edewa-nubunubui.✧

8 Aituhu avi paisewa kadewa-nubunubui ininika ivo-vi-bagibagi, paisewaia ivaiteka tupwana. Kate aituhu ahihikata, Yaubada deina, dewana ivaiteka dewa habuhabuna wayahi. Iuna Yaubada vona-dabadabaka nau-iaiaava ainua kavaniahei, vivane baina yawaika tanopia, kadue apaina yawai-vavaha wahuma.

9 Vonana vona tunutunuhina, ka nau-wawanim evitumahanei.

10 Ka vonana wayahina itoka kapaipaisewa kadu kagwagwaheyeyi. Iuna yaka nua-vaniaha nui Yaubada yawayawaina kapotepotei. Tauna ito-yavuha vo-vi-aiiaia tomotau habuhabui wayahi, ka itoka avaha kavitumahanei, vona ahiahina, ito-yavuhana kavaniahei akanai.✧

11 Ka avi viwavenena aipupuem, dewaia eveimeyeyi kadu eviwavenei.

12 Vona tunuhina, wamke tupunaim, kate eha mani tomotau eawaehe ivona-opuopuem am ponimana wayahina. Ka yau nuanua yawaim vi-pai dune tau ekalesia habuhabui wayahia, vivane yam ipupu, ka yam dewa, ka yam dune-nuanuai, ka yam vitumahana, ka kadu ahihimata.✧

13 Tuta ataina a itoava tutana an!-omo wayahima wayahina, yau nuanua Iginuma ena-iavi-vuvunaha, enaunau-wahe, kadue eviwavenena.

✧ 4:7: 1Ti 1:4. ✧ 4:10: 1Ti 2:3-4. ✧ 4:12: Tit 2:15.

14 Nonova aitam nau-hohona wayahina, tau dune-vi-avina yoko iapa-taputapu wayahim, ka nimaia am-venena bagibagina ibou-tamani omo wayahima. Akaka nau-wawanim tuta tuta am-vene-nana bagibagina wayahina epaipaisewa.✧

15 Aveimeyem dewaia ededewei, kadu nau-wawanim dewaia en'-awaehei mani dewa ivane-tawanei yawaim nihenina. Akaka tomotau in'-anamanem yam paisewa natanata kadu vidovidoha.

16 Nau-wawanim yawaim kadu yam viwave-nena edune-vi-anai, ka emuniauta-vidohei. Dewaia wayahina egwagwaheyeyi. Aituhu ededewei deina, akanai taum ena-ito-yavuhim, ka kadu am tau vaneneha ena-ito-yavuhi aitamoata deina.

5

Dewaia Timoti Nau-wawani Ekalesia Nihenina

1 Kadu eha ononotoi anani vona-panina wayahina evo-vi-tunuhi, ka eha eyapoyapoi. Kate avi tuta yawai evo-vi-tunuhi, nau-wawanim eipupu-tomotauei, tau amamam deina. Ka tupunata evi-yaianei vavaneim deina.

2 Ka kadu vaivine anani evi-ayoyonei, ka ahaba evi-novunovunei, ka yam dewa ahihinata ahahabai wayahi.

3 Nau-wawanim wadawadae wayahimia en'-anamanei ahiahina, ka aituhu aviyaivia iwadae-kea, tau ai heta itomi tau ekalesia udune-vi-avini.

✧ 4:14: 2Ti 1:6.

⁴ Kate aituhu aitam wadae natunatui o wawawai nui imamaei, natunatui nau-wawani tapanono ana dewa idewa-nubunubui, vivane yai yoko idune-vi-avini, ka amamai o ayoyoi yai dune-vi-avina inau-patai deina. Iuna dewana wayahina Yaubada ivo-vi-dewa-haiawi.

⁵ Ka vaivinei iwadae-kea ai heta imamaei, tau i yai nua-vaniaha nui Yaubada ipotepotei. Ka tuta tuta, ioyoma kadu auyewa wayahina iviama, ka Yaubada ihidehidei na-ivaitei.

⁶ Kate avi wadae tuta tuta inuanua inini ai ayaunena a vo-vi-tunuha wayahina, tau imamaei tanopia, kate nuai avaha aniga.

⁷⁻⁸ Aituhu aviyaivia eha yai nuanua yai dede ina-ivaitei, tau i yai dewana eha ahiahina. Ka aituhu aviyaivia eha yai yoko ina-ivaitei, tau i ai heta inonoi. Iuna yai vitumahana awak-abina. Aituhu aviyaivia eha yai vitumahana, akanai tau i yai dewa vivane goyona, kate aituhu avi tau vitumahana eha yai yoko ina-ivaitei, tau i yai dewa vivane goyo-vainena. Wayahina, tau vitumahana kadu dewaia eveimeyei, ka aituhu dewaia ivi-ateteyei, eha aitam koiaka ana pata tau ekalesia-naia yai dewa goyona wayahi na-mana-giboiei.

⁹ Avi wadae avaha ai ponimana ai yau 60 ivaniahei, tau i ai heta ai wava eginumi wadae ana buki nihenina, e ivaita ekalesia wayahina ivaniahei.^a Ka aitamoata aitamoata wadawadaei

^a **5:9:** Tau i sinasinapui ivona taina deina. Aituhu aviyaivia ai wava imamaei wadae ana buki nihenina, tau nau-wawani naona yawai iawaehei Iesu wayahina, kadu tau nau-wawani ipaipaisewa ekalesia nihenina. Aituhu deina, tau ekalesia ina-ivaitei kina o aniani wayahina.

wayahia nau-wawani nonova yai tavine ana tuta nihenina, vavine tunuhina imamaei, ka eha ivi-tau kenekenene.

¹⁰ Ka kadu vaivinei nau-wawani ai anamana kadu yai dewa avaha ahihinata, taina deina, vivane natunatui idune-vi-avini, ka tau bwanib-wani iaivaitei yai manua wayahina, ka yai nua-opu nui Yaubada ya tomotau iaivaitei, ka aituhu aviyaivia vita wayahia iaivaitei, ka kadu yawai iawaehei dewa ahiahi idedewei deina.

¹¹ Kate avi wadae eha ai ponimana habuhabui, tau eha nau-wawani ai wava eginumi wadae ana buki nihenina. Iuna, naona kadi yawai iawaehei Iesu wayahina, kate munia inini ai ayaunena wayahina inuanua ananina, itavine-havine, ka yai awaehana Tau Ito-yavuha wayahina itana-bwegei deina.

¹² Akaka, dewana wayahina tau ai dewa-yaiyai ivaniahei. Iuna yai awaehana naona Iesu wayahina itana-bwegei deina.

¹³ Ka kadue yai tuta ioneonei, ka ineine mani manua mani manua wayahia. Ivi-putu deina, kate munia ivi-bwanou kadu ivi-tana-pununu. Akaka, aituhu aviani eha nau-wawani ina-ipupuei, vonaia ivonevoneyei.*

¹⁴ Wayahina, avi wadae eha ai ponimana habuhabui, yauke yau nuanua ananina wayahi itavine-havine, ivi-natunatuna, ka yai manua nihenina idune-vi-avini. Aituhu idedewei deina, aka havia yai mana-gibo ibou-potepotei.*

¹⁵ Yau nuanua ananina wayahi deina, iuna tupwai avaha imagigino, ka ataina Satana

* 5:13: 2Te 3:11. * 5:14: 1Ko 7:9.

ivi-munie.

¹⁶ Avi vavine tau tau vitumahana ka aituhu wadawadae yai yoko nihenina imamaei, vaivinei nau-wawani ina-ivaitei, ka ekalesia eha vitai vaniahei. Aituhu ekalesia wadawadaei ina-ivaitei, munia ekalesia vi-kutakuta, ka eha ana pata tau iwadae-kea ina-ivaite.

¹⁷ Ka avi tau dune-vi-avina idune-vi-avini ahiahina, tau dewa tunutunuhi idedewei ekalesia nihenina. Wayahina, tau nau-wawani ai awa-dava kadue ai nau-pata ainua ivaniahei. Ka aituhu aviyaivia wayahia yai paisewa nau-wahe o viwavenena, tau nau-wawani naona ai nau-pata ivaniahei.

¹⁸ Ekalesia nihenina nau-wawanika kadedewei deina, iuna Iginuma ivona,

“Tutana bulumakauV witiV utuna va-guaguani,
 eha awana uaumei, kate bulumakauV
 un'-awaehei
 witiV utuna n'-ania.”

ka kadu Iginuma ivona,

“Tau paisewa nau-wawani
 a nau-pata na-vaniahei.”☆

¹⁹ Aituhu koiaka aitam tau dune-vi-avina mana-giboei, e voneyei, “Tauna dewa goyona dewei,” eha enononi. Ka aituhu tau hae ainua o aitonu tau dune-vi-avina imana-giboei, akanai nau-wawanim enononi.☆

☆ 5:18: VV 25:4; 1Ko 9:9; Mat 10:10. ☆ 5:19: 2Ko 13:1.

²⁰ Ka aituhu tau hae-naia yai ipupu tunuhina, nau-wawanim tau dune-vi-avinana evi-au-mini ekalesia habuhabui mataia, e yana dewa goyona esi-vin'-omanei vona-vuvunaha wayahina. Akaka, tau ekalesia imatamatauta, ka eha yai nuanua pai dune-nana goyona ivi-munie.✧

²¹ Timoti, am veimea taina avenevenem. Ka Yaubada, ka Tau Ito-yavuha Iesu, ka anelose ahihinata, tau habuhabui iawaehei am veimeana vivane veimea tunuhina. Ka avi veimea avaha avonevonem, aveimeyem ededewei aitamoata deina. Dewaia ededewei, ka eha eawaehe mani tomotau nuam epepei dewaia wayahi, kadue eha yaiam yai goyona ehivehivei.

²² Ka avi tuta tau vitumahana edune-vidovidohei, e munia tau wayahia tau eta-naonao tupwai evi-nua-dadanei, eha evo-kwayavoni, kate mai-nuam nimam eboui wayahia, e enau-iaivai Kauvea ya paisewa wayahina deina. Mai-nuam, iuna eha yau nuanua mani tomotau goyona idedewei nui upaipaisewa, kate yau nuanua taum wayahim yawaim ahihinata mamaei.

²³ Timoti, eha daudau ana heta enimnim, ka wainaV tupwana nui enimnim. Iuna tuta tuta kwanaha madim epepei, ka wainaV madim na-ivaitei.

²⁴ Tupwai tomotau yai goyona vuvunaha imamaei kadudueyei, e munia dewa-yaiyai ivaniahei Yaubada wayahina. Kate tupwai tomotau yai goyona hivahivai imamaei tanopia, kate munia dewa-yaiyai aitamoata ivaniahei Yaubada wayahina.

✧ 5:20: Epe 5:11.

²⁵ Ka kadu deinake, tupwai tomotau yai dewa ahiahi vuvunaha imamaei kadudueyei, e munia ai nau-pata ahiahina ivaniahei Yaubada wayahina. Ka tupwai tomotau yai dewa ahiahi hivahivai imamaei tanopia, kate munia ai nau-pata ahiahina aitamoata ivaniahei Yaubada wayahina.

6

¹ Avi tau vitumahana avaha ivi-tau paisewa-kavokavovo^a, tau nau-wawani iawaehei yai babada ivi-ateteyei. Aituhu idedewei deina, yai babada eha Yaubada ana wava ivona-opuopuei, kadu eha itoka yaka viwavenena ivona-opuopuei.[☆]

² Tupwai tau paisewa-kavokavovo yai babada kadu tau vitumahana. Kaiwadi, tau paisewa-kavokavovo-naia inuanua, “Aka inua tau ekalesia.” Wayahina, inuanua aituhu babadai yai veimea ivihahaiei, dewana eha aitam aviani Yaubada matana. Kate tau paisewa-kavokavovo-naia aveimeyei nau-wawani yai babadai wayahi iupu-moimoiha kadu ivi-ateteyei. Iuna yai paisewa vavanei na-ivaitei, kadu idewa-vidovidohei.

Viwavenena Tunutunuhina

^a **6:1:** Tutana Paulo leta taina ginumi, aituhu aviyaivia aga ananina ivaniahei, ka aituhu eha ai pata inau-pata, me Rom yai veimea babada awaehei tomotau ivi-maiei, e munia tomotau ivi-tau paisewa-kavokavovo babadai wayahia. Tau paisewa-kavokavovo taina deina dimdim ivi-wahani *sileva*. (Edu *sileva Vona nihenina*.) ☆ **6:1:** Epe 6:5.

Wayahina, Timoti, wamke nau-wawanim de-waia ewiwavenei kadu enau-waheyei.✧

³ Aituhu aviyaivia yai viwavenena tunina, vi-vane vitupu, tau i eha viwavenena tunutunuhi ivi-ateteye. Ka viwavenena tunutunuhi vivane yaka Kauvea Iesu Tau Ito-yavuha wayahina kadu Yaubada ya etawana ahihinata wayahina.

⁴ Ka tomotau-naia inua-vane, ka eha aitam aviani it'-anamane. Ka tau i yai nuanua ananina ivi-naua kadu ivona-patapata vonai wayahi. Ka dewana vivane goyona. Ka vi-bwanou, ka vona-panina, ka vi-naua, ka nuanua goyogoyoi ivin'-omo dewana wayahina.

⁵ Ka tuta tuta tau i ai heta wayahia ivona-patapata kadu inau-genanava. Tau i nuai vi-tupatupa, iuna viwavenena tunutunuhina ivo-haini. Ka inuanua aituhu Yaubada ya nuanua ipaipaisewei, apaina kaikaiwabo tanopia ivaniahei. Kate nuanuana eha tunuhina.✧

⁶ Vona tunutunuhina, aituhu Yaubada ya nuanua kapaisewei, ataina kaikaiwabo-hoina kavaniahei. Aituhu kawaehei aviani ataina wayahikaia aka pata, nua gomagomanina kavaniahei deina, ka nua gomagomanina kaikaiwabo ananina.✧

⁷ Iuna tutana katupua tanopia nakwakwavika kaomo, kadue avi tuta kan'-aniga, awakabika kani-tawanei.✧

⁸ Wayahina, aituhu aniani kadu kwama wayahikaia, nau-wawanika aka pata deina.

✧ **6:2:** Pile 16. ✧ **6:5:** 2Ti 3:8; 4:4; Tit 1:14. ✧ **6:6:** 1Ti 4:8; Pili 4:11-12; Ebe 13:5. ✧ **6:7:** Iob 1:21.

⁹ Aituhu aviyaivia yai nuanua ivi-tau kaikai-wabo, memeanina Satana n'-ana-dibidibiei, vi-daei, e munia yai nuanua naunau-wanana habuhabui ivitavitai. Ka yai tuta pai nau-yehata wayahina, tau ai heta yawai ivi-goyoi kadu ivita-vovoni.

¹⁰ Iuna dewa goyona habuhabuna ivin'-omo kina a nua-epa ananina wayahina. Ka tupwai tomotau ai ayaunena bagibagina ivi-tau kaikai-wabo. Wayahina, vitumahana tunutunuhina ini-kaietei, ka idewa-dadana kina ipoy'-avina. Ka munia, nua-vita yawai vunui, apia gangamna wayahina viha kavaniahei deina.*

¹¹ Kate wamke, Yaubada yana onoto, nau-wawanim dewaia habuhabui en-ovo-tawanei, ka dewa tunutunuhina evo-vi-anai, ka yam dewa deina vivane Yaubada ya nuanua, vivane yam vitumahana, ka yam dune-nuanuai, ka yam gwahea, ka kadu yam ma-genuana. Ka dewaia evi-muni-waiwaiei.*

¹² Ka kadu vitumahana a havia evi-naua-vidohei yam dewa tunutunuhina wayahina. Kadu yawai-vavaha wayahima evo-vi-anai. Nonova tutana Yaubada honem yam hae ahiahina yam vitumahana wayahina ehaeyei tau dune habuhabui mataia, ka tuta-nana wayahina yawai-vavaha evaniahei.*

¹³ Yauke aveimeyem Yaubada matana. Tauna dewa habuhabui yawai venevenei. Kadu aveimeyem Tau Ito-yavuha Iesu matana. Tauna Ponitiusi Pilate matana yana hae ahiahina haeyei.*

* **6:10:** Epe 5:5. * **6:11:** 2Ti 2:22. * **6:12:** 1Ko 9:25-26; 2Ti 4:7.

* **6:13:** Ioni 18:36-37.

14 Ka am veimea, vivane dewaia habuhabui yam leta taina nihenina, ededewei. Eha goyona edewei, kate dewa tunutunuhina ededewei, ka eha aitam iuna am havia evenei imana-giboem, tuta ataina a itoava yaka Kauvea Iesu Tau Ito-yavuha ya mavi-havinena ana tuta wayahina.

15 Ka avi tuta ahiahina Yaubada matana, tauna tuta-nana vi-nua-dadani, e Iesu na-mavi-havinei tanopia. Yaubada ana heta vivane nau-iaiaava iuna, kadue tauna Tau Veimea-hoina. Tauna kiniV habuhabui yai KiniV, ka kadu tauna kauvea habuhabui yai Kauvea.✧

16 Yaubada a heta-ohota ma'-vavaha,
ka tauna ya pai ma' mahemahe-vainena.
Ka eha aka pata kan'-omo nepena.

Ka nonova a itoava tuta ataina
eha aitam koiaka ta-dueye,
ka eha aitam koiaka ana pata
na-dueye.

Ka yau nuanua an' awa-dava
kadu ya veimea ima'-vavaha.
Ana pata deina.

17 Ka aituhu aviyaivia ataina tuta tanopi wayahina ivi-kaikaiwabo, enau-wahei vivane eha inua-vane. Ka eveimeyei, eha yai nua-epa nui ipotapota kaikaiwabo wayahina. Dewana eha ahiahina, iuna memeanina kaikaiwabo imaiova. Kate tau nau-wawani yai nua-vaniaha nui ipotapota Yaubada wayahina. Tauna dewa

✧ 6:15: SiV 17:14.

habuhabui wayahia vo-vi-kaikaiwaboka, e nui kadewa-haiawa.✠

18 Timoti, eveimeyei dewa ahiahina idedewei yai kina wayahia, vivane iam-venena, kadue nau-wawani ivo-pata-kavokavovo.

19 Ka dewaia wayahina tau i yai gugua ahiahi inau-gwaugwau i wahuma. Ka guguai inau-gwaugwau deina vivane ohona toyoina. Ka tuta tepakaia wayahina, tau i yai pai ma' ahiahina ivaniahei wahuma, ka yawai-vavaha tenoke yawaika baina tanopia vane-tawanei.✠

20 Timoti, Yaubada vitumahanem wamke onoto tunutunuhim, ka ya nuanua wayahim ekalesia Epesusi nihenina edune-vi-avini. Wayahina, edune-vi-anai, iuna paisewana vin'-omo wayahima Yaubada wayahina. Tomotau kwavakwawai yai ipupuata wayahina taniham etupa-potepotei. Iuna aviani ivonevonei eha ta-vin'-omo Yaubada wayahina. Tomotau i vona tunutunuhina inau-vonuvonuei, ka avi dewa ivi-wahani nua-uya ibou-vaneyei, kate dewaia eha nua-uya. Dewaia vivane vitupuata. Wayahina, evihahaiei.

21 Tupwai tomotau vitupuia ivitumahanei pai nua-uya, ka vitumahana tunutunuhina ini-kaietei deina.

Yau viama am-venena awawaehina Yaubada wayahina habuhabumi wayahimia mamaei.

Ana pata deina.

Yauke Paulo✠

✠ 6:17: Luk 12:20-21. ✠ 6:19: Mat 6:20. ✠ 6:21: 1Ti 1:6; 2Ti 2:18.

Awaeha Vovouna Minaveha Movia
The New Testament in the Minaveha Language of
Papua New Guinea
Nupela Testamen long tokples Minaveha long Niugini
copyright © 2008 Wycliffe Bible Translators, Inc.

Language: Minaveha

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 18 Apr 2025 from source files dated 31 Aug 2023

b67aeef-7e9d-566a-9ff5-cb22ab7e2ea4